

Tihema, 1899, ki te 28 Maehe, 1912; W. D. S. MacDonald—28 Maehe, 1912, ki te 10 Hurae, 1912; W. H. Herries—10 Hurae, 1912, ki te Pepuere, 1921; J. G. Coates—Maehe 1921, ki tenei wa.

Kei roto i tenei rarangi etahi o nga tangata nui o nga Kawanatanga. Tokorima o ratau he Pirimia ko Weld, ko Bell, ko Pollen, ko Ballance, ko Seddon,

Kaati i konei nga whakamarama mo te wahi o te Paremata i pa mai kia tatau ki te Iwi Maori. Hei kupu whakamutunga ko tenei: ko te Iwi Maori o Nui Tirenī te Iwi Maori tuatahi o nga iwi i raro i te mana o te Karauna o Ingarangi i whiwhi mema ki roto ki tetahi Paremata i noho tahi ai ratau me nga mema o te Iwi Maori. No nanahi tonu nei ka whiwhi Paremata a Inia me Ihipa. Ko tatau ko te Iwi Maori kua 54 nga tau ki roto ki tenei tikanga. He honore nui tenei.



HE MIHI NO NGAPUHI—Ko ta te rangatira kupu tona whakatauki ki ahau ki a Ngapuhi "he pou whenua" He toa ano to tena hapu, to tena iwi. I tika ai te ingoa nei Toa Takitini, he tinitini nga toa. He toa ano ahau me tetahi atu. Na reira kei te pai te ingoa nei mo ta tatou pepa ara Te Toa Takitini. Taku kupu whakamutunga, maku ta koutou tamaiti e whakamoe ki te wahine. Taku kotiro ko "Te Maramatanga" i hoatu ra e te Atua ki a Noa i roto i te ahuatanga o te Kukupa, i mohiotia ai e Noa kua kowhera te maramatanga ki te ao. Na te Atua nga mea katoa, te pouritanga me te maramatanga, nana katoa i whakato. Kei roto i enei te matauranga me te ora. Heoi kia ora katoa tatou. Ko lhowa ano hei Hepara mo tatou, hei arawhata mo tatou. Na Patu Hohaia Patuone, Okaihau.

TAHUA MO TE PEPA—Kei te mihi au ki nga whakamarama a Te Toa Takitini mo te kaha o nga tangata o Hawaiki ki te awhina i ta ratou pepa. Inahoki he £2,000 ta ratou Tahua hei oranga mo te pepa. E whakaae ana ahau ki tera tikanga ki a mahia e tatou. Me whakarite kia £2 hei koha ma te tangata mo te Tahua hei whangai i te pepa.—Heoi ano, Na F. Smith, Pahu.